



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr. 207, Datë 07.10.2024

MBI

**KËRKESËN E SHOQËRISË “TEODORI” SH.P.K. PËR LICENCIM NË
VEPRIMTARINË E PRODHIMIT TË ENERGJISË ELEKTRIKE NGA HEC “ZALLI I
BULQIZËS” DHE HEC “TERNOVË”**

Në mbështetje të nenit 16 të ligjit nr. 43/2015 “Për sektorin e energjisë elektrike”, i ndryshuar; nenit 10, pika 3 të Rregullores për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike, të miratuar me vendimin e bordit të Entit Rregullator të Energjisë (ERE) nr. 109, datë 29.06.2016, e ndryshuar; si dhe neneve 15 dhe 19, pika 1, gërma “a” të Rregullores për organizimin, funksionimin dhe procedurat e ERE-s, miratuar me vendimin e bordit të ERE-s nr. 96, datë 17.06.2016; Bordi i ERE-s, në mbledhjen e tij të datës 07.10.2024, mbasi shqyrtoi relacionin me nr. 1963/1prot., datë 03.10.2024, të Drejtorisë së Licencimit dhe Autorizimeve “Mbi kërkesën e shoqërisë “TEODORI” sh.p.k. për licencim në veprimtarinë e prodhimit të energjisë elektrike nga Hec “Zalli i Bulqizës” Dhe Hec “Ternovë””

Konstatoi se:

- Shoqëria “TEODORI” sh.p.k., me shkresën e protokolluar në ERE me nr. 1963 prot., datë 23.09.2024, paraqiti kërkesën për licencim në veprimtarinë e prodhimit të energjisë elektrike nga HEC “Zalli i Bulqizës” dhe HEC “Ternovë”, referuar Marrëveshjes së Koncesionit të miratuar me VKM-në nr. 556, datë 01.08.2003, e ndryshuar.
- Bordi i Komisionerëve të ERE-s, me vendimin nr. 83, datë 04.11.2009, ka vendosur të licencojë shoqërinë “TEODORI 2003” sh.p.k. në aktivitetin e prodhimit të energjisë elektrike nga HEC “Zall Bulqizës” me fuqi 5.350 MW dhe HEC “Ternovë” me fuqi 8.385 MW, me afat vlefshmërie 30 vjet.
- Rezulton se me VKM-në nr. 556, datë 01.08.2003 është miratuar Marrëveshja e Koncesionit e formës “BOO” ndërmjet Ministrisë së Industrisë dhe Energjistikës dhe shoqërisë “TEODORI” sh.p.k. për ndërtimin e hidrocentraleve në Ternovë dhe në Zall të Bulqizës, e cila është ndryshuar në vijim me VKM-në nr. 123, datë 14.03.2007 dhe VKM nr. 477, datë 03.06.2015.

- Marrëveshja e Koncesionit, e miratuar me vendimin nr. 477/2015, është nënshkruar ndërmjet Ministrisë së Infrastrukturës dhe Energjisë (MIE) dhe shoqërisë “TEODORI” sh.p.k. (në cilësinë e koncesionarit), ku ndër të tjera, në nenin 5 të saj, është parashikuar se: *brenda 30 (tridhjetë) ditëve nga nënshkrimi i kësaj Marrëveshjeje, Koncesionari do të formojë shoqërinë koncesionare.*
- Rezulton se për ushtrimin e veprimtarisë së prodhimit të energjisë elektrike nga hidrocentralet e përcaktuara në marrëveshjen e koncesionit të miratuar me VKM-në nr. 556/2003 është licencuar tashmë një shoqëri dhe ajo është “TEODORI 2003” e po ashtu, aplikuesi, shoqëria “TEODORI” sh.p.k., nuk ka depozituar ndonjë miratim me shkrim të MIE-s për të kaluar të drejtën e operimit të hidrocentraleve “Ternovë” dhe “Zall i Bulqizës” te koncesionari, shoqëria “TEODORI” sh.p.k., fakt ky i bërë me dije edhe më herët shoqërisë, në kuadër të vendimit të bordit të ERE nr. 75/2024 “*Mbi kërkesën e shoqërisë “TEODORI” sh.p.k. për licencim në veprimtarinë e prodhimit të energjisë elektrike nga HEC “Zalli i Bulqizës” dhe HEC “Ternovë”.*”
- Për qëllime të pajisjes me licencë për prodhimin e energjisë elektrike, rezulton se nga ana e shoqërisë “TEODORI” sh.p.k. është depozituar dhe sa vijon:
 - Shkresa e MIE-s nr. 1346 prot., datë 07.02.2024, e administruar edhe më herët nga ERE, e cila i drejtohet shoqërisë “TEODORI” sh.p.k., duke vënë për dijeni ERE-n dhe shoqërinë koncesionare “Teodori 2003” në të cilën MIE, shprehet se: *bazuar në përcaktimet e nenit 44, pika 1 të ligjit nr. 43/2015, “Për sektorin e energjisë elektrike”, i ndryshuar, kërkesa për transferimin e licencës është objekt shqyrtimi i Entit Rregullator të Energjisë, dhe se ajo nuk jep pëlqimin mbi transferimin e licencës Nr. 83, datë 04.11.2009, nga shoqëria koncesionare “Teodori 2003” shpk tek shoqëria “Tërnovë Zall Bulqizë” shpk., ka shërbyer në kuadër të vendimmarrjes së bordit të ERE nr. 54/2024 “Mbi heqjen e pezullimit të vendosur me vendimin e bordit nr. 240, datë 03.08.2023 “Mbi pezullimin e vendimmarrjes së bordit të ERE-s në lidhje me kërkesën e shoqërisë “TEODORI 2003” sh.p.k. për transferimin e pjesëshëm të licencës për prodhimin e energjisë elektrike, për HEC-in Zalli i Bulqizës, te shoqëria “Koncesionare Tërnovë Zall Bulqizë” sh.p.k.”.* Sikurse rezulton nga kjo shkresë, përveç faktit që aplikimi i shoqërisë “TEODORI” sh.p.k. në ERE është bërë për pajisjen me licencë nga e para dhe jo transferimin e një licence aktuale, MIE (e cila në marrëveshjen e koncesionit të miratuar me VKM nr. 556/2003 është në rolin e Autoritetit Shtetëror të Autorizuar), nuk ka dhënë pëlqimin për transferimin e licencës së shoqërisë “TEODORI 2003” sh.p.k. Gjithashtu, nuk rezulton që në këtë shkresë të jetë dhënë ndonjë miratim i MIE-s për të kaluar të drejtën e operimit të hidrocentraleve “Tërnovë” dhe “Zall i Bulqizës”, që rrjedh nga marrëveshja e koncesionit, te koncesionari, shoqëria “TEODORI” sh.p.k.
 - Shkresa e “Operatorit të Sistemit të Transmetimit” sh.a., nr. 2759/1 prot., datë 22.05.2024, drejtuar shoqërisë “TEODORI” sh.p.k., ku në përgjigje të kërkesës së kësaj të fundit për

ndryshim të emrit të shoqërisë në lidhjen e centralit me rrjetin, OST sh.a. shprehet se: *midis OST sh.a. dhe shoqërisë “TEODORI 2003” sh.p.k. është lidhur marrëveshja me rrjetin e datës 06.03.2015, e po ashtu se shoqëria “TEODORI” sh.p.k. nuk ka depozituar pranë OST sh.a. ndonjë miratim me shkresë të MIE-s për të kaluar të drejtën e operimit të HEC-eve te koncesionari, shoqëria “TEODORI” sh.p.k.*

Për sa më sipër, nuk rezulton që koncesionari, shoqëria “TEODORI” sh.p.k. të ketë marrë ndonjë miratim nga operatori i rrjetit, që pika e lidhjes së HEC-eve “Ternovë” dhe “Zall Bulqizë”, ti kalojë atij.

- Shkresa e Agjencisë Kombëtare të Mjedisit (AKM) nr. 5474/1 prot., datë 27.03.2024, drejtuar shoqërisë “TEODORI” sh.p.k., ku në përgjigje të kërkesës së kësaj të fundit për ndryshimin e emrit në lejen mjedisore, nga ana e AKM-së informohet shoqëria, ndër të tjera, se, bazuar në dokumentacionin dhe deklaratimet e depozituara, kjo nuk është një procedurë për ndryshim emri, por transferim nga subjekti “TEODORI 2003” sh.p.k. dhe se kërkesa e saj nuk mund të procesohet.
Për sa më sipër, edhe organi përgjegjës për menaxhimin e mjedisit ka konfirmuar që leja e mjedisit është lëshuar në emër të shoqërisë “TEODORI 2003” sh.p.k., e cila është dhe shoqëria e licencuar nga ERE, dhe nuk mund të vijohet me transferimin e kësaj lejeje.
- Shkresa e Agjencisë së Menaxhimit të Burimeve Ujore (AMBU) nr. 972/1 prot., datë 22.07.2024, drejtuar MIE-s, për dijeni subjekti “TEODORI” sh.p.k., dhe ZABU Drin-Bunë, me anë të së cilës bëhet me dije se me shkresën e datës 28.06.2024, shoqëria “TEODORI” shpk i është drejtuar me kërkesën për korrigjimin e gabimeve materiale dhe ndryshimin e emrit nga subjekti “TEODORI 2003” sh.p.k., te subjekti “TEODORI” sh.p.k. Në këtë shkresë AMBU-ja ka kërkuar nga MIE qartësimin përkatës në lidhje me kërkesën e subjektit për sa i përket emërtimeve në kontratën e koncesionit dhe shtesat vijuese të saj. Nuk rezulton që në vijim të jetë depozituar ndonjë kthim përgjigjeje e MIE-s, por as AMBU nuk ka marrë ndonjë vendim që lejet e ujit përkatëse për prodhimin e hidroenergjisë të cilat janë lëshuar për shoqërinë koncesionare “TEODORI 2003” sh.p.k t’i kalojnë shoqërisë “TEODORI” sh.p.k.
- Përveç sa më sipër, kjo çështje është shqyrtuar tashmë nga ERE dhe janë marrë vendimet përkatëse (nr. 68, datë 11.04.2022; nr. 75, datë 29.04.2024; nr. 54, datë 02.04.2024), ku në asnjërin prej tyre nuk rezulton që të jetë miratuar kërkesa e shoqërisë “TEODORI” sh.p.k.
- Po ashtu, nga ana e aplikuesit nuk është kryer pagesa e aplikimit sipas përcaktimeve të Aneksit A të “Rregullores për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike”e ndryshuar, dhe sikurse konstatuar mungon dokumentacioni thelbësor i kësaj procedure për të vijuar me trajtimin dhe shqyrtimin e një aplikimi për licencim në veprimtarinë e prodhimit, ndaj vlerësohet mosfillimi i procedurës për këtë aplikim.

Për gjithë sa më sipër, bordi i ERE-s,

Vendosi:

1. Të mos fillojë procedurën për licencimin e shoqërisë “TEODORI” sh.p.k. në veprimtarinë e prodhimit të energjisë elektrike nga HEC “Zalli i Bulqizës” dhe HEC “Ternovë”.
2. Drejtoria e Licencimit dhe Autorizimeve, të njoftojë shoqërinë “TEODORI” sh.p.k. për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI

Petrit AHMETI